



zenički privredni **2022** BILTEN

SLUŽBE ZA PRIVREDU I UPRAVLJANJE RAZVOJEM GRADA ZENICA I ZENIČKE RAZVOJNE AGENCIJE ZEDA



NEWSLETTER 1/2022

Služba za privredu, gradsku imovinu i upravljanje razvojem Grada Zenice i Agencija ZEDA periodično predstavljaju pregled najznačajnijih aktivnosti koje su realizovane u proteklom periodu.

U ovom Biltenu pročitajte koje projektne aktivnosti smo realizovali, koga smo i kojim povodom ugostili, koje edukacije i prezentacije smo organizovali i šta najavljujemo za period koji slijedi.



ZEDA ODRŽALA TRENING TRENERA IZ PROGRAMA SOLIDWORKS U OKVIRU PROJEKTA iNnovaNet

Agencija ZEDA je u januaru 2022. godine u okviru projekta iNnovaNet organizovala i uspješno provela trening iz Solidworks-a koji je namijenjen partnerima u Projektu: IPNG-Industrijski park Nova Gradiška (HR),

Inovaciono Preduzetnički Centar Tehnopolis iz Nikšića (CG) i Grad Gradiška (BiH) i korisnicima u Projektu: profesorima Tehničke škole iz Bosanske Gradiške i Mješovite srednje industrijske škole u Zenici.

Ovaj četverodnevni trening se realizovao kao trening trenera, odnosno obučeno osoblje će u narednom periodu držati obuke nezaposlenim licima, studentima, učenicima i zaposlenicima MSP-a.



Napominjemo:

Opći cilj ovog Projekta je povećanje konkurentnosti malih i srednjih preduzeća (MSP) u regiji stvaranjem povoljnog poslovnog okruženja, razvojem infrastrukture za podršku

poslovanju i poboljšanje stepena znanja sadašnjih i budućih preduzetnika, studenata i zaposlenih.

Ukupna vrijednost projekta iznosi 1.320.786,21 EUR od čega EU finasira 85%.

UPOSLENICI AGENCIJE ZEDA NA OBUCI ZA RUKOVANJE FANUC ROBOTOM/ iNnovaNet

U februaru i martu 2022. godine, kroz planirane aktivnosti projekta iNnovaNet, zaposlenici Agencije ZEDA su prošli obuku programiranja FANUC robota u DKR-u (German Center for Robotics) u Tuzli.

Radi se o Centru koji je prvi i jedini akreditovani FANUC integrator u Bosni i Hercegovini i regionu, čime je dobio ovlaštenja da prodaje, servisira i pruža edukacije po FANUC programu, uz izdavanje važećeg FANUC-DKR sertifikata.

Jedan od rezultata iNnovaNet projekta jeste novi kabinet za robotiku u okviru Agencije ZEDA za koji je nabavljena robotska edukativna ćelija FANUC ER-4iA, a koji će slu-



žiti za edukacije učenicima, studentima, (ne)zaposlenima, preduzećima, a koje će realizovati zaposlenici Agencije

ZEDA. Također, ovaj centar bit će opremljen i CNC mašinom na kojoj će se također provoditi obuke.

ZENICA MEET UP

Na posljednja tri Zenica Meet upa, koja su održana u periodu od januara do juna 2022. godine, učestvovalo je mnogo participanata širom svijeta. Razgovarali smo o događaju koji je zasigurno ostavio veliki pečat za naš grad, a to je "Steel Trail" utrka. Sama trka organizovana je zahvaljujući saradnji predstavnika Modern Escape Europe, i-platforme, Azimuth 135 i grupe "Rijeke BiH - Budi promjena". Također smo dosta govorili o brojnim realiziranim aktivnostima, robotici i IT svijetu, gdje se dosta vremena posvetilo budućim projektima koji su itekako korisni za lokalnu zajednicu.



Istaknuto je da se u Zenici odnedavno događa ekspanzija malih IT firmi, da su zenički IT stručnjaci, vrlo često, primorani raditi za strane klijente jer pružaju mnogo bo-

lje uslove rada u odnosu na domaće, kao i da je trenutna situacija takva da je potražnja za IT stručnjacima mnogo veća u odnosu na tržišnu ponudu.

ODRŽAN KICK 2. RADIONICA NA TEMU RAZVOJA MOGUĆIH SCENARIJA ZA NBS-OVE U OKVIRU PROJEKTA PROGIREG



U martu 2022. godine održana je druga radionica sa najvažnijim predstavnicima relevantnih institucija u gradu Zenici. Tema sastanka bila je prezentacija identifikovanih područja za transformaciju sa primje-

nom NBS (rješenja zasnovana na prirodi) na konkretnim lokalitetima. Nakon prezentacije održana je diskusija po pitanju razvoja mogućih scenarija za implementaciju NBS-ova. Razgovaralo se o preprekama koje

su prisutne te o načinima kako se one mogu prevladati. Na kraju sastanka prisutni su konsolidirali pomenute scenarije te se dogovorili oko narednih koraka koji nas očekuju tokom implementacije projekta.

Grad Zenica i Agencija ZEDA dio su međunarodnog konzorcija proGireg projekta u sklopu Horizon 2020 programa EU u kojem imaju ulogu aktivnih učesnika kroz prenos iskustava i prakse vodećih gradova projekta.

Ostali partneri koji sudjeluju na Projektu su vodeći gradovi: Zagreb, Dortmund i Torino kao i prateći gradovi: Prag, Cluj, Sofija, Pirej, Zenica, Ningbo (Kina), te još 21 institucija koja se bavi tematikom vezanom za cilj Projekta.



PREDSTAVNICI GRADA ZENICE I AGENCIJE “ZEDA” NA SASTANKU GRADOVA UČESNIKA U PROJEKTU “C

Predstavnici Grada Zenice i Zeničke razvojne agencije ZEDA posjetili su Cascaisu u Portugalu u okviru ProGireg projekata koji finansira Europska komisija u okviru programa Horizon 2020.

U periodu od 30. marta do 01. aprila 2022. godine projekat ProGireg je okupio sve projektne partnere u Cascaisu u Portugalu gdje je predstavljena implementacija prirodnih rješenja. Napravljeni su enormni usponi u implementaciji prirodnih rješenja - pokazujući se kao inspiracija svima!

Kako je već poznato ProGireg se zalaže za „produktivnu zelenu infrastrukturu za postin-

dustrijsku urbanu regeneraciju“, a cilj joj je postići urbanu regeneraciju kroz prirodu u postindustrijskim područjima Evrope i Kine.

Okupljanje predstavnika proGireg projekta svih gradova koji učestvuju u ovom projektu temeljni je dio projekta kako bi se osiguralo da općine i gradovi mogu učiti iz aktivnosti drugih.

Predstavnici Gradova su spomenuli da je ključno povezati se s lokalnim nevladinim organizacijama kako bi se osiguralo da se građani u ranoj fazi angažiraju u planiranju prirodnih rješenja, npr. održavanjem radionica kako bi se drugi edu-

cirali o prirodnim rješenjima, poput onih koja se provode u Zagrebu, Torinu i Dortmundu. Cilj ProGireg Projekta je razvijanje produktivne zelene infrastrukture u svrhu urbane regeneracije bivših industrijskih područja, te održivi urbani razvoj, implementacija zelenih i pametnih tehnologija, zdrav način života, kombinacija rada i življenja, socijalne inovacije kao dio vizije jednakog urbanog razvoja unutar gradskih četvrti (Urban Neighbourhood), a sve u skladu s načelima primjene rješenja temeljenih na prirodi (Natural Based Solutions), u sklopu EU programa Horizon 2020.

PREDSTAVNICI GRADA ZENICE I AGENCIJE ZEDA NA SASTANKU KONZORCIJA PROJEKTA AGORA U RUMUNIJU

U aprilu tekuće godine, predstavnici Grada Zenice i Agencije ZEDA učestvovali su na sastanku konzorcija projekta AGORA, koji se održao u Rumuniji u općini Cluj - Napoca. Grad Zenica kao partner i Agencija ZEDA kao pridruženi partner, uzeli su učešće na ovom događaju koji je imao za cilj da dodatno poboljša saradnju među partnerima u projektu, da se rezimiraju dosadašnje uspješno realizovane aktivnosti, a tokom boravka u Rumuniji, naši predstavnici su posjetili i okrug Iris odnosno pilot područje Cluja-Napoce.

Napominjemo:

Riječ je o projektu koji se finansira iz programa INTERREG Danube Transnational Programme – Dunavskog Transnacionalnog Programa i povezuje ukupno 28 stalnih i pridruženih partnera iz 14 zemalja (Rumunija, Hrvatska, Slovenija, Njemačka, Češka Republika, Belgija, Italija, i druge), a od čega 10 gradova. Vrijednost projekta je 2.242.623,51 EUR i implementira se od 01.06.2020. godine do 30.11.2022. godine, odnosno 30 mjeseci.



AGORA ima za cilj unapređenje rada lokalnih samouprava, odnosno jačanje kapaciteta za proaktivnu ulogu u oblasti razvoja, testiranjem i ugradnjom novih operativnih i političkih instrumenata za urbanu revalorizaciju imovine. AGORA raspolaže sa inovativnim pristupom koji podrazumijeva razvijanje različitih alata kojim se osnažuje 10 gradova dunavskog regiona da postanu pokretači i posrednici za bolju iskorištenost nekretnina u nji-

hovom vlasništvu.

Implementacijom projekta AGORA, Grad Zenica i Agencija ZEDA će unaprijediti upravljanje gradskom imovinom (poslovni prostori, društveni domovi, Biznis inkubator, TechnoPark) poduzimajući aktivnosti na njihovoj kontinuiranoj rekonstrukciji kao i na uključivanju drugih aktera u procesu donošenja odluka za ponovno stavljanje u funkciju napuštenih ili dovoljno neiskorištenih prostora.

GRAD ZENICA I AGENCIJA ZEDA ODRŽALI DRUGU RADIONICU U OKVIRU AGORA PROJEKTA – „INSTRUMENTI I MOGUĆA RJEŠENJA“

U aprilu 2022. godine, u organizaciji Grada Zenice i Agencije ZEDA održana je Druga radionica u okviru AGORA Projekta – „Instrumenti i moguća rješenja“.

Prisutni su imali priliku pogledati tri odabrane lokacije za revitalizaciju – „Kananinac“ kojeg je predstavila direktorica JU „Predškolski odgoj i obrazovanje“ Zenica, „Papična“ koju je predstavio arhitekta iz JP za prostorno planiranje Grada Zenice, Andrej Šetka i „Gradski park“ koji je predstavila v.d. Šef sektora za ekologiju i komunalne poslove, Jakuta Imširović– njihovu prvobitnu namjenu, trenutno stanje i aktivnosti planirane u AGO-



RA projektu koje će rezultirati njihovom ponovnom upotrebom. Radionici su prisustvovali predstavnici Univerziteta u Zenici, zenički privrednici, predstavnici

Gradske uprave Zenica, Agencije ZEDA, JP preduzeća za prostorno planiranje i uređenje grada Zenica te predstavnici nevladinog sektora.



GRAD ZENICA I AGENCIJA ZEDA NA SASTANKU TRANSNACIONALNOG PROJEKTA AGORA U SOFIJI

U maju 2022. godine, predstavnici Grada Zenice i Agencije ZEDA učestvovali su na sastanku partnera projekta AGORA koji je održan u Sofiji.

Domaćini ovog događaja bili su Udruženje za razvoj Sofije i Općina Sofija, a pristustvovali su mu partneri iz Moldavije, Rumunije, Hrvatske, Slovačke, Njemačke, Češke, Mađarske i Bosne i Hercegovine.

Tokom događaja, učesnici su razmijenili ideje, iskustva, predstavili do sada realizovane aktivnosti u

okviru ovog projekta, prezentovali programe revitalizacije pilot projekata, prijedloge revitalizacije i stakeholdere. Također, razgovaralo se i o potencijalnoj modifikaciji budžeta svakog od partnera te o raspoloživim opcijama za nastavak AGORA projekta kroz apliciranje na novi javni poziv Interreg programa.

Ovom prilikom, učesnici su posjetili i objekat nekadašnje Toplocentrale – pilot projekat Sofije koji danas predstavlja postor za savremenu umjetnost i služi inova-

tivnim oblicima kulturnog i umjetničkog izražavanja, okupljanje građana Sofije i međunarodnih umjetnika.

Transnacionalnom sastanku su se pridružili i predstavnici drugih bugarskih općina, stakeholderi drugih INTERREG Danube projekata iz oblasti kulture i urbane regeneracije. Razmatrani su alati za izgradnju kapaciteta koji će se koristiti tokom razvoja projekta, finansijski i poslovni modeli, stakeholderi, te prostorno planiranje i održivost.



USPJEŠNO ODRŽANA TREĆA RADIONICA TRANSNACIONALNOG PROJEKTA AGORA na temu “RAZVOJ STRATEGIJA”

Po povratku iz Sofije, u maju 2022. godine, AGORA tim pripremio je radionicu na temu „Razvoj strategija“ koja je i posljednja ovog tipa u okviru projekta AGORA.

Učesnici su razgovarali o Razvoju strategija za ponovno stavljanje u funkciju tri objekta koja se dugi niz godina ne koriste, a koji se žele revitalizirati u budućnosti. Odabir objekata je izvršen tokom procesa konsultacija sa predstavnicima univerziteta, privatnog sektora, nevladinog sektora i javnog sektora kako je i predviđeno quadriple helix modelom.

Radionica je održana u prostorijama šahovskog kluba „Čelik“, a učesnici su kroz kviz, prezentacije, rad u grupama, te kroz diskusije i zaključke, došli do prijedloga za promjenu namjene i buduću revitalizaciju – obdaništa „Kanarinac“, industrijskog objekta „Papirna“ i Hotela „Rudar“.

Sljedeća aktivnost na projektu podrazumijeva organizaciju sastanka fokus grupa koja će potvrditi zaključke sa radionice, te dati posljednje inpute potrebne za izradu dokumenta „Agenda za urbanu regeneraciju“ što je jedan od izlaznih rezultata projekta.

Napominjemo - AGORA je projekat koji se provodi i finansira u sklopu EU INTERREG Dunavskog transnacionalnog programa. Konzorcij projekta okuplja 28 partnera iz 14 zemalja, od čega 10 gradova. Grad Zenica ima status partnera, a Zenička razvojna agencija ZEDA status pridruženog partnera.

Više informacija o AGORA projektu možete pročitati na linku

<https://www.zenica.ba/centar-za-investitore/aktuelni-projekti/agora/>

GRAD ZENICA, AGENCIJA ZEDA I UNZE ORGANIZOVALI DAN ROBOTIKE ZA OSNOVCE

Polovinom juna tekuće godine Grad Zenica, Agencija ZEDA i UNZE su održali “Dan robotike za osnovce” koji je realizovan u okviru projekta “AGORA”.

Događaj je okupio više od stotinu učenika osnovnih škola koji su imali priliku upoznati se sa osnovama robotike, u praksi vidjeti kako roboti funkcionišu, kako se programiraju i na koji način se nauče da rade pojedine zanimljive radnje.

Upravo su djeca ta koja najbrže uče rukovati novim tehnologijama i kroz igru i zabavu usvajaju nova znanja.





U ZENICI ODRŽANO DRŽAVNO TAKMIČENJE U ROBOTICI

Polovinom juna tekuće godine u Gradskoj areni „Husejin Smajlović“ u Zenici održano je Državno takmičenje u robotici. Univerzitet u Zenici u saradnji sa EDUTUS Univerzitetom iz Mađarske organizovao je takmičenje Svjetske robotske olimpijade (World Robot Olympiad – WRO) za područje Bosne i Hercegovine.

Državno prvenstvo se održalo uz pokroviteljstvo Grada Zenice i Agencije ZEDA kroz projekat AGORA, koji se finansira iz Dunavskog Transnacionalnog Programa, te Ministarstva za obrazovanje, nauku, kulturu i sport Zeničko-dobojskog kantona. Manifestaciju su podržali i BH Telecom, Devmatec, Ruff cycles SEE d.o.o. i GS-Tvornica mašina Travnik.

Na takmičenju je učestvovalo 18 ekipa podijeljenih u tri dobne grupe. Dvije ekipe iz Zenice su osvojile prva mjesta u kategorijama elementary (8-12 godina) i senior (15-20 godina), dok je ekipa iz Tuzle osvojila prvo mjesto u kategoriji junior (12-15 godina). Samim tim ove



ekipe su se plasirale na svjetsko takmičenje, koje će se u periodu od 17-19. novembra 2022. godine održati u Dortmundu (Njemačka).

Grad Zenica i Agencija ZEDA su pružili tehničku podršku u organizaciji ovog takmičenja kao i pokroviteljstvo posredstvom AGORA projekta, koji se finansira iz Dunavskog Transnacionalnog Programa, a na

kojem Grad Zenica ima status partnera, a ZEDA status pridruženog partnera. Pilot akcija na ovom projektu je buduća namjena objekta Aneks B, koji je trenutno u fazi rekonstrukcije. Događaj je podržan u sklopu predviđenih aktivnosti kao tkz. flagship projekat, a u svrhu promocije budućeg centra za robotiku u Aneksu B zgrade Agencije ZEDA.

PROJEKT AGORA PODRŽAO ZETTABYTE IDEATHON

Početak jula tekuće godine, održan je Zettabyte Ideathon – dvodnevni događaj koji su organizovali studenti IT-a, stipendisti Fondacije BH Futures Foundation zajedno sa svojim partnerima: Gradom Zenicom, Agencijom ZEDA kroz AGORA projekat u okviru kojeg su već organizovani slični događaji iz oblasti IT-a.

Cilj ovih mladih ljudi je da probude developere u našim mladim ljudima, da ih zainteresuju za ovaj poziv pun mogućnosti i pogodnosti, pruže uvid u ono što ih čeka u budu-



ćem fakultetskom školovanju i IT karijeri, te daju stimulans za savladavanje željenih pro-

gramerskih tehnika tako što će svakom učesniku dodijeliti Udemy kurs po želji.

GRAD ZENICA I AGENCIJA ZEDA SA PRIVREDNICIMA UČESTVOVALI NA Konferenciji Impakt „Prvih 300“

Investicijska fondacija IMPAKT održala je sredinom maja tekuće godine konferenciju „Prvih 300“ na kojoj su prezentovani rezultati ove Fondacije za period 2018-2022.

Grad Zenica je u periodu od 2019. – 2021. godine učestvovao u programu podrške razvoju preduzetništva baziranog na inovativnom konceptu, za iskazivanje interesa učešća u Javnom pozivu jedinica lokalne samouprave i Vlada kantona u Bosni i Hercegovini za uspostavu partnerstva u realizaciji YEP inkubatora poslovnih ideja. U sklopu zajedničke saradnje između Investicijske fondacije IMPAKT i Grada Zenice realizovan je program mentorske i savjetodavne podrške za postojeće obrtnike i preduzetnike, kao i program preduzetničke obuke te finansijska, stručna i mentorska podrška za 15 novih poslovnih poduhvata na području grada Zenice. Neki o njih su imali priliku da se



predstave na Sajamu „IMPACT inkubator poslovnih ideja“, kao što su Kidotent, CNC Art i Elosso Studio.

„Ponosni smo što smo IMPACT inkubatore poslovnih ideja realizirali u 55 lokalnih zajednica gdje se rodilo preko 1.800 ideja. Razvijeno je više od 500 biznis planova, podržano 300 biznisa, a čak 600 radnih mjesta je kreirano kroz biznise koje smo podržali kroz IMPACT inkubator“, poručio je Senajid Đozo, izvršni direktor Investicijske fondacije Impakt. Investicijska fondacija Impakt nastavlja podržavati razvoj poduzetničkog ekosistema lokalnih zajednica kako bi stvorili bolje uslove

za pokretanje biznisa koji su zasigurno važni i za sami razvoj lokalnih zajednica. „Saradnja i partnerstvo koju imamo sa lokalnim zajednicama, službama za za pošljavanje i kantonalnim i entitetskim ministarstvima dokaz su da je naš rad dokazano uspješan i dugoročan, a čemu govori i činjenica da je survival rate biznisa čak 98%“, dopunio je Đozo. Na panel diskusiji poduzetnici su poručili da im je za lakše poslovanje potrebno smanjenje administrativnih i komunalnih taksi, digitalizacija (web servisi, informativni servisi) i podrška institucija prilikom osnivanja novih preduzeća.

U AGENCIJI ZEDA ODRŽAN SEMINAR ZA NASTAVNIKE MATEMATIKE I INFORMATIKE OSNOVNIH I SREDNJIH ŠKOLA

Četiri dana poslije Državnog takmičenja u robotici, u junu 2022. godine, koje je održano u okviru projekta AGORA, Udruženje matematičara Zeničko-dobojskog kantona uz podršku Grada Zenice i Agencije ZEDA također kroz projekat Agora organizovalo je seminar za nastavnike matematike i informatike osnovnih i srednjih škola pod nazivom „Digitalni alati u nastavi matematike“.

Potrebno je pronaći načine na koje možemo tehnologiju iskoristiti u različitim segmentima života. Informacijsko-komunikacijske tehnologije mogu biti i alat za podučavanje u nastavi matematike i informatike za šta su potrebni educirani nastavnici koji su kompetentni odnosno koji znaju na koji način će učenicima predstaviti mogućnosti korištenja ICT u matematici i informatici. Udruženje matematičara Ze-

ničko-dobojskog kantona želi dati svoj doprinos obrazovnom sistemu i nastavnicima matematike i informatike omogućiti profesionalno usavršavanje. Pored predavanja, učesnici seminara imali su priliku i praktično vidjeti na koji način mogu koristiti digitalne alate u nastavi.

U narednom periodu Zeničani i Zeničanke mogu očekivati slične događaje u okviru ovog Projekta.

GRAD ZENICA DOBIO SREDSTVA ZA UNAPREĐENJE I RAZVOJ RURALNE/LOKALNE TRŽIŠNE INFRASTRUKTURE



Grad Zenica aplicirao je na Javni poziv za unapređenje i razvoj ruralne/lokalne tržišne infrastrukture, koji je objavljen u okviru projekta EU4AGRI, za koji su u maju 2022. godine odobrena sredstva za implementaciju projekta „Unapređenje infrastrukture i sajamskih kapaciteta Gradske tržnice Zenica“ koji se finansira u sklopu Projekta „Podrška Evropske unije za konkurentnost poljoprivrede i ruralni razvoj u Bosni i Hercegovini“ pod akronimom EU4AGRI. Projektom je planirana na-

bavka rashladnih vitrina za opremanje JP „Tržnica“ Zenica, mobilne drvene kućice za sajamske potrebe, vanjskih stolova za pijacu za JP „Tržnica“ te kanti odnosno kontejnera za odlaganje biljnog otpada. Osim naprijed navedenog, planirana je adaptacija prilazne staze za ulazak u JP „Tržnica“, postavljanje taktilnih oznaka za slabovidne i slijepe osobe na ulazu u JP „Tržnica“ i unutrašnji prodajni dio, kao i obezbjeđenje konsultantskih usluga. U sklopu konsultantskih usluga je predviđena re-

alizacija obuke iz oblasti sanitarnog minimuma za minimalno 50 osoba, realizacija obuke iz oblasti sigurnosti hrane i HACCP-a za minimalno 50 osoba, zatim realizacija obuke o manipulaciji i prodaji proizvoda u uslovima pandemije COVID-19 za minimalno 50 osoba (uključujući krajnje korisnike), realizacija paketa mikrobiološke analize za korisnike projekta u toku implementacije projekta te izrada protokola o postupanju prilikom prodaje proizvoda na tržnici u uslovima pandemije COVID19 i izrada smjernica iz oblasti sigurnog poslovanja sa hranom. Ukupna vrijednost projekta iznosi 316.857,00 KM, od čega je 232.927,00 KM odobreno u okviru EU4AGRI Projekta, dok je Grad Zenica osigurao sredstva u iznosu od 83.930,00 KM.

Rok za implementaciju projekta je 18 mjeseci odnosno period juni 2022 - decembar 2023.

UPOSLENICI AGENCIJE ZEDA NA OBUCI ZA TESTIRANJE GRAĐEVINSKE STOLARIJE U MAKEDONIJI

Agencija ZEDA je 2010. godine dobila grant sredstva Evropske unije, za provođenje projekta MENTOR (Modern Economy through New Technology – Oriented Research). Najvažniji zadatak je bio osnivanje laboratorije za ispitivanje sigurnosti proizvoda (namještaj i dječija igrališta), te njena akreditacija za rad u skladu s evropskim standardima iz te oblasti.

Laboratorija LIND je zvanično otvorena u novembru 2012. godine, a tokom 2013. godine su provedene aktivnosti na akreditaciji Laboratorije kod BATA instituta (Institut za akreditiranje Bosne i Hercegovine). Od oktobra 2013. godine LIND je zvanično akreditovana laboratorija, a u njoj se provode mehanička ispitivanja.

Agencija ZEDA je 2016. godine implementacijom projekta MENTOR II (Modern Economy through New Technology) i nabavkom opreme, proširila područje rada Laboratorije LIND i na građevinsku stolariju (vrata, prozori i fasadni elementi).



U martu 2022. godine, uposlenici Agencije ZEDA su bili na obuci u Laboratoriji za testiranje namještaja LTM koja djeluje pri Univerzitetu „Ćirilo i Metodije“ u Skoplju.

Uposlenici Agencije ZEDA koji provode ispitivanja u Laboratoriji LIND ovom su prilikom usavršili praktični dio obuke iz oblasti testiranja građevinske stolarije (prozora, vrata i fasadnih elemenata) po evropskim standardima čime su se stvorili svi preduslovi akreditacije zeničke laboratorije.

Ovo će biti jedina Laboratorija u BiH u kojoj će proizvođači

građevinske stolarije moći ispitati kvalitet svojih proizvoda i dobiti izvještaj o ispitivanju koji je priznat u svim zemljama Evropske unije.

Treba naglasiti da je ovo zakonski propisana procedura koju moraju proći svi proizvođači građevinske stolarije prije nego proizvode plasiraju na tržište.

Time će Grad Zenica, Agencija ZEDA odnosno Laboratorija LIND pomoći preduzećima iz cijele BiH i regiona da njihovi proizvodi budi konkurentni na bosanskohercegovačkom i evropskom tržištu.

AGENCIJA ZEDA ODRŽALA PREZENTACIJU JAVNOG KONKURSA FEDERALNOG MINISTARSTVA RAZVOJA, PODUZETNIŠTVA I OBRTA

Nakon što su predstavnici Agencije ZEDA učestvovali na prezentaciji Javnog konkursa koji je objavilo Federalno ministarstvo razvoja, poduzetništva i obrta za odabir korisnika grant sredstava tekućih transfera za 2022. godinu koju su održali predstavnici ovog Ministarstva u Razvojnoj agenciji Žepče u Žepču, u maju 2022. godine predstavnici Agencije ZEDA u

saradnji sa predstavnicima BASIC Centra održali su prezentaciju ovog Javnog konkursa za zeničke privrednike u prostorijama Agencije ZEDA.

Prezentaciji su prisustvovali predstavnici zeničkih preduzeća koja žele aplicirati na Javni konkurs, a prisutnima je BASIC tim koji ima bogato iskustvo u pisanju projekata i koje pruža usluge konsultacija i savjetovanja za MSP

i stat up-e, prezentovalo Javni konkurs, te ponudilo usluge pisanja projekata i savjetovanja pri apliciranju.

Bio je ovo još jedan događaj koji ima za cilj da zeničkim preduzećima olakša pristup dostupnim sredstvima koja će im pomoći pri razvoju poslovanja, jačanju konkurentnosti, boljem pozicioniranju na tržištu i ekonomskom osnaživanju.

JOŠ JEDNA GENERACIJA STUDENATA USPJEŠNO OKONČALA PRAKSU U AGENCIJI ZEDA



U aprilu tekuće godine, grupa studenata treće godine Politehničkog fakulteta UNZE je obavila praksu u Agenciji ZEDA.

Kao i svih godina do sada, studenti su se upoznali sa svim sektorima i oblastima u kojima Agencija djeluje, te su posjetili nekoliko preduzeća u

kojima su se upoznali sa njihovim djelatnostima, opremom kojom raspolažu, procesima proizvodnje i sl.

„Studentima prezentujemo ono što radimo i ono što će oni raditi u budućnosti. Prezentovani su im svi naši odjeli i procedure, te način rada. Tokom prakse su posjetili preduze-

ća u kojima će možda već po okončanju studiranja raditi, te steći prvo radno iskustvo. Također, ovo je bila prilika da se empirijski upoznaju sa onim što su na fakultetu učili. Nekoliko njih je već najavilo da će učestvovati na kursovima koje organizujemo za sticanje novih vještina, jačanje kompetencija i ekonomsko osnaživanje. Uvijek nam je zadovoljstvo biti domaćin mladim ljudima koji su željni znanja, novih informacija i poslovnih izazova“ – rekli su iz Agencije ZEDA.

Ovo je već tradicionalna aktivnost koju UNZE u saradnji sa Agencijom ZEDA realizuje u ovom periodu.

Sretno studentima i da čim prije iskoristite diplome i dobijete posao u struci.

GRAD ZENICA OKUPIO SVE PRIJAVLJENE VIŠKOVE POLJOPRIVREDNIH PROIZVODA



S ciljem podrške poljoprivrednim proizvođačima, ali i penzionerima Grad Zenica je proveo Javni poziv poljoprivrednim proizvođačima sa područja grada Zenice kako bi ostvarili viškove poljoprivrednih proizvoda, koji će nakon završetka procedure po javnom pozivu biti podijeljeni penzionerima.

U sklopu ovog javnog poziva

u januaru 2022. godine, poljoprivredni proizvođači su prijavili viškove proizvoda i to ukupno 60 tona krompira, četiri tone luka i 12 tona jabuka. Podrška poljoprivrednim proizvođačima i penzionerima koja se ogleda u otkupu viškova poljoprivrednih proizvoda je aktivnost koju Grad Zenica nastavlja svake godine.



GRAD ZENICA POMAŽE PENZIONERE I POLJOPRIVREDNE PROIZVOĐAČE

I ove godine Grad Zenica nastavlja pomagati članove Udruženje penzionera/umirovljenika Grada Zenica i to podjelom poljoprivrednih proizvoda.

Riječ je o viškovima poljoprivrednih proizvoda koje je Grad Zenica otkupio od poljoprivrednih proizvođača, te na taj način, pored penzionera, pomaže i poljoprivredne proizvođače na području grada.

GRADONAČELNIK KASUMOVIĆ POSJETIO FIRMU “ZE-STEEL GALVANO” U POSLOVNOJ ZONI ZENICA 1

Gradonačelnik Zenice Fuad Kasumović posjetio je firmu “Ze-Steel Galvano” u Poslovnoj zoni Zenica 1, u martu 2022. godine, a koja izvozi 80% godišnje proizvodnje u zemlje Europske Unije.

Prema riječima Fuada Kasumovića, gradonačelnika Zenice, pored svih obaveza koje ima nastoji pronaći vrijeme i za uspješne, mlade, kompanije koje posluju u gradu.

Ovo je firma koja radi galvanizaciju ili u narodu poznatije kao cinkovanje. Ovakva proizvodnja ima još samo u Konjicu, što znači da će “Ze-Steel Galvano” u budućem periodu samo još više napredovati.



STUDENTI MAŠINSKOG FAKULTETA UNZE U POSJETI LABORATORIJU LIND

U maju tekuće godine, studenti IV godine Mašinskog fakulteta Univerziteta u Zenici, posjetili su Laboratoriju LIND koja djeluje u okviru Agencije ZEDA.

Ove posjete su postale već tradicionalne jer Agencija ZEDA od samog osnivanja Laboratorije ima odličnu saradnju sa UNZE čiji studenti obavljaju praksu u Laboratoriji LIND, pišu seminarske, diplomske i magistarske radove u saradnji sa Agencijom ZEDA, preduzećima koji su korisnici usluga ispitivanja sigurnosti proizvoda i Laboratorijom LIND.

Studenti su se upoznali sa radom Laboratorije, akreditovanim standardima, zakonskim procedurama, te su imali pri-



liku vidjeti proces ispitivanja sigurnosti proizvoda.

– „Uvijek nam je zadovoljstvo sarađivati sa UNZE i dati svoj doprinos upotpunjavanju njihovog obrazovanja. Ono što

oni teorijski nauče na fakultetu, mi im prezentujemo empirijski. Naša vrata su uvijek otvorena za studente i radujemo se nastavku saradnje“ – poručili su iz Agencije ZEDA.



GRAD ZENICA SA 10.000 KM SUFINANSIRA PROJEKT “OZNAČAVANJE I UREĐENJE PLANINARSKIH STAZA NA PLANINI SMETOVI”

Gradska uprava Zenica podržala je, odnosno sufinansirala, sa 10.000 KM pilot projekat “Označavanje i uređenje planinarskih staza na planini Smetovi”, a kojeg realizira Udruženje građana “Azimuth 135” iz Zenice u 2022. godini.

U prošloj godini Udruženje građana “Azimuth 135” je ura-

dilo izvidnicu oko 80 posto staza koje će biti uređene odnosno markirane, te uradilo okvirni proračun potrebnog materijala za nevedeno.

Ovim projektom po prvi put će biti urađeno sistematsko, unificirano i po pravilima Planinarskog saveza BiH, markiranje i uređenje neke planine

u okolini Zenice i šire. .

Inače, ukupna vrijednost projekta “Označavanje i uređenje planinarskih staza na planini Smetovi” iznosi 20.050 KM, a Grad Zenica sufinansirat će ga sa 10.000 KM, dok će preostalih 10.000 KM osigurati Ministarstvo za privredu Zeničko-dobojskog kantona.



IZDAVAČ: Grad Zenica; **PRIPREMA PUBLIKACIJE:** Služba za privredu i upravljanje razvojem i Zenička razvojna agencija ZEDA; **AUTORI TEKSTOVA:** Armin Mujkić, Maida Mujanović, Ajna Dedić, Maša Škrbić; **FOTOGRAFIJE:** Emir Čaplja, Mirza Subašić; **DTP:** Emir Čaplja; **ŠTAMPA:** MeligrafPrint Zenica